


[www.BibleForChildren.org](http://www.BibleForChildren.org)

# Mateus 26



Aniaditibige  
seis nokododi  
daga nakatio  
nalokegi Páscoa,  
nigigo Jesus mani  
nigotakawaana Betânia  
ane ligeladi Lázaro,  
nigijo ane yewikatiditace  
Jesus. Odaa Maria ja  
dibata aca bootawaana ane  
nolee ladokojegi, idatawece  
“nardo”, one dakake loojedi.



Odaa ja yadotelogo  
logonaka Jesus,  
igaanaga igodi me  
yadotelogo, odaa  
yatita lamodi me  
iwilegi. Odaa nigijo  
lanigi aneletege nigijo  
ladokojegi jigigotigi  
initawece diimigi.




Judas Iscariotes nigijo anida aneetege nigijo dooze  
anodiotibece Jesus igo yotaganeege  
nigijo anoige sacerdotedi me  
dinilakidetege me yajigo Jesus.  
Odaa eliodi me ninitibigiwaji  
nogowajipa ane ligegi, odaa  
jogodinilakidetege moyedia.  
Odaa Judas jigidaa  
dinanatigi me  
doletibige nigica  
nimawenegegi  
me yajigo  
Jesus.



Nigijo anodiotibece jogowo ane  
iigete Jesus, odaa jogoyoe  
liweenigi Páscoa. Egidaagee me  
niodaga, Jesus ja dibate ijo paon,  
odaa diniotagodededibigimece  
Aneotedogoji. Odaa ja inoke me  
yajigotediogi nigijo anodiotibece,  
odaa meetediogi, “Abaatege,  
odaa elici nigidi paon!  
Ane micataga  
daga yolaadi.”




Nigidiaagidi ja dibate ajo goopa  
ane nolee viinyo, odaa ja  
diniotagodededibigimece  
Aneotedogoji. Odaa jagaga  
yajigotediogi nigijo anodiotibece  
nagajo goopa, meetediogi, “Acipeta  
akaamitawecetiwaji!”



“Igaataga nigida viinyo micataga  
daga yawodi ane inadoogodi,  
jaotibige Aneotedogoji mida gela  
nimawenegegi me dinilakidetetege  
nigina oko. Odaa natigide  
Aneotedogoji yakadi me iwilegi  
libeyacegeco inatawece oko.”




Odaa Goniotagodi jegee, “Simão, Simão, digawini!  
Satanás dipokotalo Aneotedogoji me ika me  
dineetagawa akaamitawecetiwaji, me gadigikeni,  
micataga nawodaganaga me yajigijice leyeema,  
catinedi beneela. Pida jagaga jipokotaloco  
me gadaxawani  
Aneotedogoji,  
me daga ikani  
madadiwagati,  
Simão.”





“Odaa nige adopilitiwa, odaa awii me yoniciwaditace ganioxoadipi mabo laalegena.” Pida Pedro meetalo, “Iniotagodi, ja idigo makaami iniwilagawa, codaa makaami yemagawa.” Odaa Jesus meeteta, “Pedro, ejitagawa, nigina enoale anigicatibige daga anoe okogokoodi, odaa itoatadigida meni me dagadowoogoti.”



Odaa Jesus ja  
lixigagawepodi nigijo  
anodiotibece midiwataga  
icoa enanigijedi “oliveira”  
anodita Getsêmani.  
Odaa meetediogi,  
“Inaaganicootetiwaji  
digoina. Ejigawaanigi  
digoida odoe jotaganenege  
Aneotedogoji.” Odaa Jesus  
mee, “Eiodi yemaanigi,  
akati mawii okanicodaagica.”



“Nigemaani  
adatamagateenitege  
nigicoa yawikodico  
ane leeditibige me  
jixomagateetedice!  
Pida jemaa me jao  
nigica anemaani, idigida  
aginokinoa niginoa ane  
emaga jemaa me jaote.”



Odaa Judas jigigo nigijo aneite Jesus, yadeegi ijoa iodagawadi romaanotedi ijaagijoa onatecigijoa nowienogododi ligeladi Aneotedogoji, liigexedi fariseutedi ijaagijoa lacilodi sacerdotitedi. Oyadeegi noledagaxiidi inaa lalagonagatedi, codaa me likanaganagatedi.



Odaa jigijo ica aneyacilotidi ica limeedi nigijo  
lacilo-sacerdotitedi, yakagiditice napaagate ane  
digeticogi libaagadi. Pida Jesus yoxogo,  
meete, “Jagabo, jinagaleegawii  
gadoenatagi!” Odaa ja  
dibatedinece napaagate  
nigijo nimeedi, odaa  
ja yexocagaditacedi.



Odaa jogoniwilo Jesus, jogoyadeegitedicogi ligeladi  
nigijo lacilo-sacerdotitedi. Odaa Pedro ja diotece,  
pida leegitece me  
yototedice. Nigijo  
nogoyelotigi noledi  
liwigotigi niogó ica  
diimigi, odaa ja  
dinitotibigiwaji.  
Odaa Pedro  
jagaga nicotini  
miditaga.



Onijoteci  
nigijoa niotaka ane  
litaagi nigijo Pedro  
ane yakagiditice  
napaagate, meeta  
Pedro, “Ica ina daga  
gadati digoida aneite  
enanigijedi nialeli.” Odaa  
Pedro jigijaa naga inaaletace  
mee me digicoateda me  
yowoogodi Jesus. Odaa agica  
daga leegi jaganoe okogokoodi.  
Odaa Pedro ja noditicogi anei,  
odaa eliodi manoetibece.



Odaa ijotawece nigijo lapo-nelegi  
dabiditiniwace, odaa jogoyadeegi  
Jesus minitaga Pilatos. Odaa Pilatos  
ja ige Jesus, meetalo,  
“Ewi nagakamagakaami  
ninionigi-eliodi  
judeutedi?” Jesus  
ja igidi, meeteta,  
“Iniotagodi, ewi  
nigida gagegi.”






Odaa Pilatos jogopitacege me  
notaganegetiniwace, leegodi  
domaga lipegegedi me  
ikatedice Jesus.

Pida jegepaanaga  
napaawagatelo  
nigijo noiigi, modi,  
“Otonitedeloco  
nicenaganagate!  
Otonitedeloco

nicenaganagate!”




Odaa Pilatos ja yajigo Jesus  
moyototedeloco nicenaganagate,  
odaa jogoyadeegi nigijoa iodagawadi.  
Odaa ja noditedice Jesus, epaa  
yoyagaditedijo ajo licenaganagate.  
Odaa jigigotibeci minitaga lojotagadi  
ane liboonagadi “Lojotagadi  
godacilo-libitagi”. (Nioladi  
judeutedi nigini  
liboonagadi “Gólgota”).



Joanigidiaa oyelite nogoyototedeloco  
nicenaganagate ijaagijoa itoataale  
goneleegiwadi. Odaa odoyate  
Jesus liwigotigi  
nigijoa itoa.



Codaa nagajo lipegetege minitaga Aneotedogoji  
ligeladi, ane iomagaditege oko aneite Aneotedogoji,  
nagajo lipegetege daawidigidicetigi liwigotigi  
ditibigimedi, icogotibigimece  
ditibigimedi negepaa natinedi.  
Odaa Jesus dinigetagatee  
me dapaawe, mee, “Eiodi,  
jajigotagawa iwigo!” Naga  
nigotedini me dotaga,  
odaa ja yeleo.



Naga gocidi, jigicotio José  
anelatibige nigotaga Arimatéia  
minitaga Pilatos. José  
goneleegiwa anele,  
lokaagetedipi me  
nibaaga nigijoa  
seteenta lacilodi  
judeutedi.

Ja walitege nigica  
noko Aneotedogoji  
nige iige laalegenali  
nigina oko. José abo  
laalegena migo  
dipokota Pilatos Jesus  
lolaadi.



José dinoojeteta aca lipegetege  
lapacogogo, odaa ja noga  
Jesus lolaadi madataga  
nicenaganagate, odaa ja  
ilipaditigi Jesus lolaadi  
nagajo lipegetege.

Nigidiaagidi ja  
yadeegiticogi  
Jesus lolaadi

midataga ica ane  
gela moigodi  
lawimagajegi-wetiga.  
Odaa José ja noxoco  
yatita aca wetiga  
nelegi me noxoco.



Naga saabado, ja  
ixomagatijo onijoteci  
noko modinenyagaditege  
lalokegi Páscoa. Nigijo  
anoiige sacerdotiedi  
ijaagijoa fariseutedi  
jigigotibeci  
minitaga Pilatos.



Odaa modita, “Iniotagodi,  
nalagatibigogoji nigijo  
malee yewiga nigijoa  
awitakegi, meetedibece,  
‘Nige ixomagatedijo  
itoatadigida  
nokododi, odaa ja  
idewigatace.’”





Odaa jigigotibeci, jogoyatitagaditi  
nagajo wetiga ane noxoco nigijo  
lawimagajegi-wetiga,  
owo me digicata ane  
yakadi me itinege  
nagajo wetiga. Odaa  
jigidiaagoyoyate  
iodagawadi me  
nowienaganadi.



Naga ixomagatijo saabado, ja  
yapacagatege nigo me nakatio  
domiingo, Maria Madalena  
ajaagajo eledi Maria  
jigigotibeci odalita  
nigijo libegi Jesus.



Maleedigicotibeci, jonaga datalale  
iigo, leegodi niaanjo Goniotagodi  
Aneotedogoji me dinikatini,  
odaa ja nogatice nagajo  
wetiga nelegi ane  
noxoco nigijo  
lawimagajegi-wetiga  
aneitice lolaadi  
Jesus,

odaa ica aanjo  
ja nicoteloco  
nagajo  
wetiga.



Odaa nigijoa nowienaganadi  
eliodi me doitibigiwaji,  
nawigicagatelo,  
odaa ja liciagi nigina  
oko baanaga yeleo.



Odaa nigijo aanjo meetiogi nigijo  
iwaalepodi, nigicotiobeci,  
“Jinagadoii! Jowoogodi  
managi oleetibige Jesus,  
nigijoa anoyototedeloco  
nicenaganagate  
moyeloadi.”



“Agaleegicoa digoina, leegodi ja  
yewigatace, jigicota nigijo ane  
ligegi. Anagi, awini nigijo  
anoyatedice.”




Odaa nigijo iwaalepodi ja  
yediigatibigiwaji me noditicoaci  
nigijo lawimagajegi-wetiga, eliodi  
me doitibigiwaji, pida nigidiaagidi  
ninitibigiwaji. Waleditibigiwaji  
migotibeci oibodicaxi nigijo  
anodiotibece Jesus.



Odaa naigitece codaa nogonidoateda  
Jesus naga dakapetetege nigijo  
iwaalepodi, odaa ja nicetediniwace,  
meetediyogi, “Inibeotege mele  
gadaalegenali!” Odaa jogodiitalo,  
oibedotece logonaka,  
codaa odogetetalo.







Nigidiaagidi Jesus ja dinikeetediogi nigijo oonze anodiotibece nigijo me niodaga. Odaa ja napetegetediniwace leegodi laalegenali dagaxa me dakake, codaa leegodi me dogoyiwagadi naga yewigatace nogoyatemati nigijo anonadi naga yewigatace. Nigijo Goniotagodi Jesus naga ika me notaganenegetediniwace, odaa Aneotedogoji ja yadeegitedibigimece ditibigimedi, odaa ja nicotedi liwai libaagadi Aneotedogoji ikee mida nagatetigi.



Aneotedogoji  
eliodi me yemaa  
okotigi digoina iigo, joanigidaa leegodi  
me yajigo nigijoa oniniwatece me Lionigi  
lemaanigi, eotedibige minatawece  
nigina anoyiwagadi agalee nigo, pida  
jigida lewiga ane dagadiaagica  
liniogo miniwataga  
Aneotedogoji.



### Romanos 3:23

Igaataga inatawece oko inoa libeyacegeco, codaa agicoa iniwa ane igenaga daga liciagi Aneotedogoji, ane dagaxa me igenaga, yapidi, codaa agica libatiigi.

### Romanos 6:23

Leegodi loojedi nibeyacaga ane jibagatege baga némaga, odaa idiokaanaga limedi me leegitalo Aneotedogoji me jotonagatedice. Pida liboonigi Aneotedogoji ane najigotedogowa baga godewiga ane dagadiaagica liniogo Miniwataga, leegodi nigijo loenatagitedogodomi Goniotagodi Jesus Cristo.

### Hebreus 9:27

Inatawece oko icota me nigo, odaa onidateci me yeleo nigina oko. Odaa Aneotedogoji ja iwi nigica anigoteta.



## Efésios 2:8,9

Leegodi Aneotedogoji meliodi meletedogodomi, odaa jegeote me gela godewiga leegodi me jinakatonaga Cristo. Agotaga jakataga me jinakatonaga daga jibakenaga okomaga godoniciwaga, pida Aneotedogoji godaxawa me jinakatonaga Cristo, micataga daga gonogeeditalo gotiwagatakanegegi. Aneotedogoji agodaxawa me jinakatonaga Cristo daga leegodi me jaoga godoenataka anele, doitedibige digica ane yakadi me dinagaxaketibece.

## Romanos 10:9,10

Joanigidaageeta nigida nibodigi: Nigenita eledi oko Jesus me Goniotagodi, codaa nige iwagati Aneotedogoji me yewikatiditace me yeleo, odaa Aneotedogoji eote gadewiga. Igaataga nigina mewi mejiwagatakanaga manitawece godaalegena, Aneotedogoji eote me godegenaga, codaa nigejinagatece gotiwagatakanegegi, odaa Aneotedogoji jegeote me godewiga.



## João 3:16,17

Aneotedogoji eliodi me yemaa okotigi digoina iigo, joanigidaa leegodi me yajigo nigijoa oniniwatece me Lionigi lemaanigi, eotedibige minatawece nigina anoyiwagadi agalee nigo, pida jigida lewiga ane dagadiaagica liniogo miniwataga Aneotedogoji.

Aneotedogoji niige Lionigi me yewikatidi inatawece oko. Aniige Lionigi me iwi, oditaga iloikatiditeda oko leegodi loenataka ane beyagi.



## 1 João 5:11-13

Joanigidaa ane nikeetedogowa Aneotedogoji me najigotedogowa godewiga ane dagadiaagica liniogo miniwataga, codaa nigida godewiga icogotigi miniwataga Lionigi. Nigina oko aniniwa Aneotedogoji Lionigi minitaga joaniginiaagida lewiga ane digica liniogo miniwataga Aneotedogoji. Pida nigina oko ane digicoateda Lionigi Aneotedogoji minitaga, joaniginiaagini agica lewiga ane digica liniogo. Jiditibigagaji nagadi notaganagaxi akaamitiwaji ane iwagati Lionigi Aneotedogoji, amaleegaga owoogotitiwaji mida gadewiga ane digica liniogo miniwataga, codaa amaleegaga idioka limedi me iwagati Goniotagodi.



Mateus 26-28; Lucas 22-24; João 13-21

Storyline by: Edward D. Hughes

Illustrated by: Janie Forest  
and Alastair Paterson

Adapted by: Lyn Doerksen

Kadiwéu Bible (kbc) © 2010, Wycliffe Bible Translators, Inc.  
All rights reserved.

<https://live.bible.is/bible/KBCWYI/MAT/1>

©2024 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

